

Regulativ d'alps,  
pastgiras e prada

digl

Cumegn da

Tinizong-Rona

# CUNTIGN

	<u>artetgels</u>	<u>pagina</u>
I DISPOSIZIUNS GENERALAS	1 - 4	2
II ALPS	5 - 15	3
III PASTGIRAS	16 - 17	6
IV PRADA	18 - 31	7
V DISPOSIZIUNS PENALAS, MEDS LEGALS	32	11
VI DISPOSIZIUNS FINALAS	33 - 34	11

## I. DISPOSIZIUNS GENERALAS

### Art. 1

*Proprietad* Las alps e pastgiras sen territori digl cumegn da Tinizong-Rona èn proprietad digl cumegn. Exceptiuno èn: L'alp digl Plaz, l'alp da Nascharegnas e l'alp da Spegnas èn corporaziuns.

### Art. 2

*Dretg da pascular* Mintga travagl puril cun dimora segl territori digl cumegn Tinizong-Rona ò igl dretg da pascular sen alps e pastgiras communalas.

### Art. 3

*Fittanza* Igl cumegn dat a fit tottas alps, vot deir Err, Tigiel, Surnegn e Colm da Boys all'uniun purila Tinizong-Rona e surlascha a chella l'organisaziun interna.

### Art. 4

*Survigilaziun* La survegilaziun dallas alps e pastgiras surstat alla suprastanza communalas. Chella ò er igl dretg d'adossar cumpetenzas e da dar cumonds agls tgeas d'alp per aveir urden e rughel.

## II. ALPS

### Art. 5

*Presta-  
ziuns*

Albierts ed inventari movibel èn proprietad da cumegn. Igl cumegn s'obliescha tenor basigns d'eriger bietgs novs e da mantigneir chels. Pina-  
vant procura el per veias, punts, conducts d'ava e per la migliuraziun dallas pastgiras.

### Art. 6

*Inspeziun*

Igl canzlist communal fò mintg'aton l'emda siva la scargeda ansemen cun igls tgeas d'alp en'inspeziun digls bietgs e digl inventari d'alp e rapporta alla suprastanza.

### Art. 7

*Termins  
per carger  
e scarger*

La staschung per alpger vign fixada davent digl amprem da zarcladour anfignen igl davos da settember. Igl termin exact vign fixo dall'uniun purila.

### Art. 8

*Occupa-  
ziun  
maximala*

L'alp da vatgas d'Err porta maximal 120 vatgas. Niss en'alp surcargeda, schi stò neir fatg en barat cun ena tala noua tg'èn anc ervas libras.

### Art. 9

*Biestga  
estra*

Vign en'alp sotcargeda, schi pò neir alpagea cun biestga estra. Igls tgeas d'alp ston orientar igl pi tard igl amprem da matg la suprastanza digl domber da mintga malgia.

## Art. 10

*Portgs  
d'alp*

Per applitgier la scotga è l'uniun purila oblieida da metter se portgs. Minimum en portg sen tschintg vatgas. Igl portgs èn proprietad dall'uniun ed igl retgav u igl deficit vo a chint da chella. Preferien-tscha per la compra digls portgs on indigens.

## Art. 11

*Sieranzas*

Igl personal d'alp vign siero dall'uniun purila cunter disoletg e malsogna. Igl premis von a gra-vezza da chella.

## Art. 12

*Pernotta-  
ziuns sen  
las alps*

Igl albierts dall'alp d'Err stattan angal a disposi-ziun agl personal. Per igls albierts dallas otras alps pò la suprastanza far excepziuns.

## Art. 13

*Depot da  
fagn e  
lagna*

Per betg stueir tschassar sainza basigns, procura l'uniun a sies chint en depot da fagn.

Igl cumegn metta a disposiziun igl basiglevel quantum lagna per scaldar e cascher. Igl transport è tgossa dall'uniun purila.

## Art. 14

*Ervadi*

Totta biestga tgi vign messa a pastg per curt u lung taimp paia l'antiera taxa d'ervadi. Chella monta:

	<u>taxa per toc:</u>
- vatgas	25.00 fr.
- tremas, muias	17.50 fr.
- vadels	12.50 fr.
- biestga manedla (tgoras, nursas)	2.50 fr.

- portgs gratuit
- tgavals 25.- fr.

La taxa d'ervadi vign incassada dall'uniun purila.

#### Art. 15

*Biestga  
malsanga*

Vatgas e tremas tgi bettan, scu er biestga cun mal-sognas contegiouas, ston neir allontanadas immediat dalla malgia. Tals animals dastgan eir puspe sen pastgira angal cun lubientscha digl veterinari.

### III. PASTGIRAS

#### Art. 16

*Pascular  
durant la  
stad*

La pasculaziun da vatgas da tga, vadels tardeivs e biestga malsanga allas aclas ed a tga, è libra durant la stad.

#### Art. 17

*Seivs  
moviblas*

Per sarar aint tocs pastgira e colms cun seivs moviblas, stò neir dumando mintg'onn a taimp la lubientscha alla suprastanza. Talas seivs ston neir allontanadas suandontamaintg:

- Pastgira da premaveira igl pi tard 10 deis siva la cargeda
- pastgira d'aton igl pi tard igls 31 d'otgover o. c.
- sen las aclas e colms pon igls pals star sur onn, igls isolators ston neir allontanos igl aton.

## IV. PRADA

### Art. 18

*Bual* Igl bual è scumando per totta biestga e da tot taimp. En possessour u ples possessours da differents flatgs vischinants pon sa cunvagneir per taimp e bualar singul u an cuminanza faschond seiv suffiziainta cunter confinants.

### Art. 19

*Veias* Tottas veias terminadas scu er talas da traffic, da gôt e d'alp èn proprietad da cumegn. Chellas dallas corporaziuns èn privatas.

### Art. 20

*Deponias, parcadis* Per deponer lenom, grascha e vehichels sen territori communal è necessari ena lubientscha dalla suprastanza. Chella vign angal concedeida, schi igl petent posseda betg agen taragn adatto per tal scopo. Igl taimp da lubientscha vign limito.

### Art. 21

*Seivs e meirs* Seivs e meirs ston neir mantignias. Per donns caschunos causa da mancanza da mantignamaint vign fatg responsabel igl possessour. Vign tralaschea igl mantignamaint, ordinescha igl cumegn reparaturas a chint digl possessour.

### Art. 22

*Dotgs ed uals* Dotgs ed uals ston neir tignias averts da tot taimp da maniera tgi na possa betg neir caschuno donns



agls confinants.

### Art. 23

*Passagi da  
taimp da  
raccolta*

Tals tgi èn durant igl taimp da raccolta sfurzos da traversar flatgs dad oters, èn obliias da far tganvol e metter igl fretg sot tetg agl proprietari. Reservo èn eventualas ancligientschas tranter igls respectivs proprietaris.

### Art. 24

*Dretg da  
passagi  
agricol*

Schi en possessour da taragn na posseda betg ena veia suffizainta per la cultivaziun digl sies fons davent digl sies flatg tar ena veia publica, è el autoriso da passar tras igl flatg digl vaschign.

Chella preteisa sa drezza analog alla servitut da passagi agl senn digl art. 694 digl codesch civil an amprema lengia vers igl vaschign digl qual ins pò pretender igl pi tgunsch en passagi per la cultivaziun agricola tenor las relaziuns da proprietad e veias d'anfignen ossa e pinavant vers chel agl qual ins fò igl pi pac donn cun en passagi perveia dalla cultivaziun agricola. Chels passagis existan sainza inscripziun aint igl codesch funsil. Igl dretg da passagi duess neir exequia cun chito e sa drezza tenor usus local. Chesta determinaziun vign applitgeida angal per fons tgi sa catta ordvart las zonas da biagier cun vigour legala. (I. e II. et-tappa).

### Art. 25

*Plantas*

Appartenent distanza digl cunfegn per plantas valan las determinaziuns dalla lescha da biagier.

## Art. 26

*Schurmetg da plantas e bulias* Arisguard plantas e flours schurmagedas scu er igl culeir bulias sen territori communal valan las determinaziuns dallas leschas cantunalas correspondentas.

## Art. 27

*Fons da cumegn* Igl fons da cumegn vign repartia an stols e do a tschains a travagls purils segl territori communal. Las parcelas vignan stimadas d'ena persunga uffiziala. Iglis stols vignan repartias dalla cumischung d'agricultura agls affitaders interessos. Tar plessas annunztgas vign risguardo igl interessent tgi cultivescha ena parzella cunfinonta. Vign en travagl puril dissolvo, schi vignan las parcelas respectivas reparteidas agls interessents, preferond igls interessents tgi cultiveschan parcelas cunfinontas. Iglis singuls flatgs on da neir lados e mantignias an duevel stand. Igl è scumando da far foss da grascha sen parcelas da cumegn. Iglis colms dastgan neir nizzigias angal mintga dus onns.

## Art. 28

*Transitar la prada* Igl è scumando da transitar la prada cun vehichels e cun animals. Durant igl decurs digl amprem da matg anfignen igls amprens d'otgover, vot deir dall'antschatta dalla vegetaziun anfignen la fegn dalla raccolta, ègl scumando da transitar la prada per pedungs. D'oter taimp è igl transit lubia per pedungs, schi-

navant tgi na resulteschan nigns donns agl possessour. 1)

#### Art. 29

*Manar or  
puschigna*

Igl manar or e sprizzar puschigna è scumando ainten las zonas da biagier scu er sen ena distanza da 20 meters davent digl cunfegn dallas zonas da biagier.

Per igl ulteriour territori communal è an connex cun sprizzar puschigna, da piglier risguard sen bietgs existents. Appartenent igl taimp da manar or puschigna, valan las ordinaziuns cantunalas.

#### Art. 30

*Donns  
d'animals*

Per donns caschunos d'animals, stò star bung igl possessour. Igl transit liber da gaglignas è scumando da tot taimp. Tgangs pon betg transitar libers per veias e prada anturn. La suprastanza destinescha sen tge veias tgi dastga neir tgavalgea.

#### Art. 31

*Loipas*

Donns caschunos da loipas ston neir stimos e bonifitgias.

1) Revisiun parziala digls 29-08-2008

## V. DISPOSIZIUNS PENALAS, MEDS LEGALS

### Art. 32

*Surpassamaints* Surpassamaints e contravenziuns cunterchel regulativ vignan punias dalla suprastanza cun 5.- anfignen 500.- fr.

La suprastanza pò incumbensar igls organs da pulizeia d'incassar la multa directamaintg.

## V. DISPOSIZIUNS FINALAS

### Art. 33

*Dissoluziun* Cun igl regulativ preschaint vignan dissolvos tot igls regulativs existents arisguard alps, pastgiras e prada.

### Art. 34

*Antrada an vigour* Igl regulativ per alps, pastgiras e prada preschaint aintra an vigour cun l'acceptaziun dalla radunanza communal.

Chel regulativ è nia accepto dalla radunanza communal Tinizong-Rona igls 22-10-99

Igl mastral:

Igl actuar:

Mario Jegher

Mario Dosch

La revisiun parziala (aboliziun digl taimp da pasculaziun e modificaziun digl artetgel 28) è neida acceptada dalla radunanza communalala igls 29-08-2008

Igl mastral:

Igl actuar:

Gian Jegher

Mario Dosch